

清光緒朝中日交涉史料

卷卅三之卷卅四
二十一年

中國經濟史綱要

第一編 緒論

清光緒朝中日交涉史料卷卅三

(二六〇六) 戶科掌印給事中洪良品奏倭患益深計窮勢迫請直攻日本以圖牽制

而救眉急摺

光緒二十一年正月二十二日

四品銜戶科掌印給事中稽察西倉臣洪良品跪奏爲倭患益深計窮勢迫請直攻日本以圖牽制而救眉急恭摺仰祈聖鑒事臣謹考日本疆域分八道六十六州不過中國兩省之地借英債二千餘萬民債無算其國本貧外強中乾勞師襲遠其所以敢於深入我地者蓋早窺內地武備廢弛人皆習於講和之說而不欲戰也乃至與之講和而彼仍不應且益擾我沿海各郡勢將阻我運道使京城坐守待斃此其志豈在小哉我中國海口延袤萬餘里此堵彼竄防不勝防轉瞬南漕運行彼以偏師游弋海中將不戰而自困此固倭奴處心積慮爲計之毒而料之審者此本中國之瑕而不知已之亦有瑕也謹案日本北爲對馬島與山東之登州徑直南爲薩峒馬與浙江之温州台州徑直長崎一島與浙江之普陀東西對峙廈門至長崎北風由五島入南風由天堂入相去不過數十更蓋海道以更計程一晝夜爲一更也凡兵法制人不制於人彼能闖我堂奧我亦能擾彼庭戶彼能渡鴨綠江而西來我亦可渡對馬島而東往彼全師遠出本國必然空虛請旨飭下兩江總督張之洞閩浙總

督邊寶泉臺灣巡撫唐景崧密籌會議各選得力將弁專募沿海漁丁蟹戶亡命之徒計二三萬人率以直搗日本擾其長崎鹿島橫濱神戶等處徑逼王京彼必回師救援再有宋慶依克唐阿等兩面夾攻擊其情歸使彼受一大創庶知中國之不可侮或有慮其報復者不知此正止其報復彼若再有蠢動亦恐中國之潛師襲後也且示中國師能襲遠永免他國生心此亦自強之一策所謂殷憂啓聖正在此時蓋我乃大國彼乃小夷也以餉言之我合十七省以籌餉源源接濟不似日本借債難籌以兵力言之我抽募沿海亡命之徒一呼卽集不似日本借助漢奸且卽有小敗隨募隨添戰於彼境較之戰於戶庭者利害懸絕以萬國公法言之彼滅我藩屬擾我海郡殺掠我吏民奪我砲臺險隘理已先屈不爲無故尋仇臣閱史鑑亦知元人初入中國不知海道沙綫遽率師征日本致颶風起而全軍漂沒後遂視爲畏途不知彼乃黠武故爲天心所不順今我乃救危當亦天心所深許況我與日本互市往來頻年遣使不絕其各島門戶我亦熟習不似元人之冒昧以圖可毋他慮也不然我卽徼幸一戰勝之彼不得志於此地必將生衅於他處將軍事終無了期矣此策輿論僉同近日言者亦衆臣去歲曾條陳兩次其時寇尙未深故朝廷意在持重可圖徐制今事勢日迫南漕尤爲難緩之圖欲止惡氛更無他法故不避煩瀆視聽敬請聖斷施行以紓近憂而

弭後禍想樞臣等蒿日時艱同心體國亦鑒微忱而思圖共濟也臣爲扶危救急起見合無飭下沿海疆臣速籌進取以維大局幸甚謹奏光緒二十一年正月二十一日

（二六〇六）附件一 洪良品奏內閣中書許枋擬有避礮之策請發往沿海疆臣處

以備采擇片

再聞倭人臨陣以十金募一戰士後退者殺之今與議和勢必先索兵費我若與以兵費是代敵募人以自攻也以後各國起而效尤其何以堪故倭人亦知無向人索兵費之理迺務深入以圖挾制其意甚狡况倭人所索兵費必以千百萬計我有此兵費懸賞以募戰士何人不踴躍攻敵而乃輕開此端代敵募人以自攻乎以臣愚計不如徑飭沿海疆臣直擣其虛庶有以懾其膽而奪其氣卽和亦易就至於轉餉製船疆臣自知措置朝廷但下片紙假以便宜而其事已立集矣惟外夷專恃礮火之利前此諒山一戰亦爲中國所敗而其礮火竟不能行茲有內閣中書許枋自言參考成法擬有水陸避礮之策其人似屬可用擬請發往沿海疆臣處以備采擇可否伏候聖裁謹奏

(二六〇六) 附件二 洪良品奏請查抄衛汝成等家產以助軍餉片

再臣讀邸鈔見上諭所示葉志超罪狀已屬法無可逭乃以臣所聞葉志超卽無此數重罪
朝陽一役死有餘辜蓋其帶兵勦辦朝陽並未殺真馬賊只濫殺平民數百人報功其保舉
文武人員多有未到行閒者肆意欺蒙是其慣技朝陽人至今怨恨刺骨至此次在平壤李
鴻章得洋人報倭賊於兩禮拜後攻取平壤之信電致平壤葉志超目笑存之日招官妓徵
歌飲酒及賊四面圍攻其妾弟戴長榮勸豎白旗求免葉乃陰自潰逃被賊追殺兵卒死亡
殆以萬計故朝鮮人有莫跟葉志超只管向西跑之謠龔照璵總辦旅順全軍營務十月初
九日聞大連灣警信是夜卽潛往煙台因之部兵逃散到處擾掠所棄船廠料物水旱雷六
百餘具暨軍械礮臺計貲均值千萬數而賊猶未到是旅順因龔照璵逃走而後失陷其罪
較之被賊攻失陷者尤重至衛汝成趙懷業等不知下落恐其逃入敵中請旨密拏務獲張
士珩總理天津軍械局每銀萬兩只用三千中飽七千倭人又以重價將洋槍購去遂致今
年軍械缺乏而其價銀四十萬半入私囊聞其家在金陵現已回家理合查拏訊究此數人
平日皆剋扣軍餉侵吞公項家貲各擁鉅萬合無請旨飭下各督撫嚴密查鈔以助軍餉之
處伏乞聖裁臣聞倭人用法極嚴凡後退者必殺故其軍勝多敗少今我軍恃朝廷寬大之

恩不畏法而畏敵是以望風卽潰敬請仰法祖宗朝戮訥親青磨故事債軍者立行正法用以挽逃潰之風而儆三軍之懼庶軍事乃可振興當此時事日棘非行用重典不能有濟愚慮未知是否伏乞聖鑒謹奏

(二六〇七)山東道監察御史龐鴻書奏海疆緊要宜聯絡聲勢請飭統兵大臣統籌

全局以固重防摺

光緒二十一年正月二十二日

掌山東道監察御史臣龐鴻書跪奏爲海畿緊要宜聯絡聲勢以固重防謹陳管見仰祈聖鑒事近者倭奴寇陷威海海軍盡沒勃海門戶全失倭奴船隻得以往來自如自登萊以北至山海關海岸袤延千有餘里綜計各口南則大沽北塘北則樂亭爲最重大沽北塘有礮臺可以扼守大沽又爲各國通商之地倭奴未必卽敢輕犯惟樂亭南通津沽東倚榆關爲關外諸軍後路咽喉輪軌所經若不預爲防範竊恐倭奴從而生心陰謀窺伺冀奪鐵路以斷我軍之後又大沽以南北皆係沙灘並無礁石處處可以登岸聞滄州之岐河口外曾有倭船在彼測量水道倭奴慣用間道包抄之詭計旅順威海之失皆由於此不可不加意設防以期嚴密者也顧以千里海疆處處分兵則嫌單弱擇要而守又慮蹈虛必使聲勢聯絡

偵探明確首尾相應方無顧此失彼之虞臣愚以爲永平遵化境內宜責成劉坤一天津南北一帶宜責成王文韶親往沿海周歷巡視擇地布置各軍務使聲息相通一處有警卽可就近援應又宜廣爲偵探倭船所向卽嚴守以待使彼知我處處有備稍息其窺伺之謀至滄州鹽山之間現無重兵駐守僅恃團練力有未足亦宜預爲調集以防未然現在各路防軍未能得手新募之營未經大敵必先能守而後可以言戰統率不可以不專號令不可以不一可否飭下統兵大臣於沿海一帶統籌全局務必無隙可乘庶足以得地利而固重防臣愚昧之見是否有當謹繕摺具陳伏乞皇上聖鑒謹奏光緒二十一年正月二十二日

(二六〇七) 附件一 龐鴻書奏請飭察閃殿魁潘萬才兩軍兵將片

再行軍之道選士與擇將並重兵法云士不素練是以器械予敵也將不知兵是以士卒予敵也近來新募之兵急於成軍往往未暇精選而將領之中亦多以平日養尊處優習於驕惰甚乏可用之材臣風聞總兵閃殿魁所統各營類多募自近處雜以市井之人窳惰性成其拔隊起行之時至有涕泣不願去者又聞總兵潘萬才人本庸下前平朝陽會匪以冒功得保自天津來者皆言其營中紀律不嚴不免虛飾之習現在該兩軍均駐劄要地若果如

所聞何足資以禦敵可否飭下劉坤一王文韶將該兩軍詳悉點驗察看士卒之不堪用者汰之將領之不勝任者易之無令孱弱庸懦濫廁其間庶幾將勇兵精可期得力矣臣見聞所及是否有當謹附片具陳伏乞聖鑒謹奏

(二六〇八)都察院左副都御史楊頤等奏請電飭雲南提督馮子材北來爲游擊之

師摺 光緒二十一年正月二十二日

都察院左副都御史臣楊頤日講起居注官四品銜詹事府左春坊左庶子臣戴鴻慈跪奏爲沿海備多力分勢難堵禦請亟調勁旅爲游擊之師以資策應而固邊防恭摺仰祈聖鑒事竊惟旅順前失威海繼淪寇偪門庭惟當扼陸自守計南自岐口北至洋河袤斜三百里有奇港汊紛歧在在皆可登岸臣等揣之天津通商地方倭人不無顧忌大沽水程迂曲輪船亦難逕進故備禦之方大沽以北各口均爲緊要現除大沽以南所駐兵勇較多外聞北塘僅有吳育仁四營津練四營吳宏洛六營蘆台僅有卞長勝馬步一營七哨樂亭一帶僅有王可陞馬隊二營劉光才五營申道發五營洋河僅有賈起勝八營大率三四千或五六千名不等分布海口兵力尙單倭以大隊來侵彼衆我寡且各守汛地難相馳救萬一擣虛

竄入深可寒心若處處添募重兵一時力有未逮莫若先調董福祥一軍進紮北塘余虎恩一軍回紮樂亭爲游擊之師無論何處警急聞報卽速赴援與該處防軍一律嚴計功罪無得推諉兩員爲著名宿將並聞其情意交孚素相聯絡况天津至山海關一路本有火車趨赴必捷如此局勢旣活防禦較周並可爲出奇制勝之用夫大局關鍵全在門庭沿海者門庭也近畿者堂奧也門庭能保堂奧乃可無虞其理至顯惟在斷以行之耳至雲南提督馮子材忠勇老成勳績迭著現准兩江督臣調赴江蘇刻下直疆喫緊自當先其所急應請旨電飭北來俟其到時並令於沿海要處屯紮與樂亭北塘兩軍共爲三大支游擊之師首尾相應則畿輔重防益臻完固可否仰懇宸斷飭下督辦王大臣迅速妥議檄行之處伏乞皇上聖鑒訓示謹奏光緒二十一年正月二十二日

(二六〇八)附件一 楊頤等奏請諭令侍郎剛毅酌保粵軍得力員弁募軍北來以

固畿旬片

再寇氛逼近兵分力薄自宜亟籌策應之師以固畿甸但倭夷猖獗至此非痛加懲創防堵終無了期伏查越南一役粵軍奮力攻勦法夷奪氣緣粵軍趨捷輕利且素與夷習知其技

藝短長見慣不驚故敢於殺敵今之禦倭惟粵軍最爲可用前事堪徵粵中宿將如馮子材劉永福等早已奉調出省而此外得力員弁尙不乏人禮部侍郎剛毅官粵有年必能深悉應請諭令該侍郎據實保奏數員各令召募成軍迅速北來卽交該侍郎統帶擇要駐紮以當一面該侍郎日前雖未歷戎行然蒞粵三次廉公夙著深得粵人之心若令歸其節制將士必踊躍効命共奏膚功不特畿防有裨卽夷氛所到亦可資以前驅矣臣等愚見相同附片陳請伏乞聖鑒謹奏

(二六〇九)出使大臣張蔭桓邵友濂來電

光緒二十一年正月二十二日到
電報檔

密仁節譯伊藤英文說帖今日日本大臣所行之事係不得已之舉中國聞不講外交與鄰相處不肯開誠布公從前曾有與人定約不肯蓋印及條約已定無故不批准之事皆所派大員權力不足之故本國慮蹈前轍是以必須中國所派大員權足定和方能與議及聞中國業經派員本國亦卽派本大臣等爲全權大臣商議今貴大臣權力實係不足可見並非誠心講和彼此勅書不同之處甚多本國勅書係照萬國公法成式貴國勅書大相懸殊派貴大臣來商何事勅書內並未載明又無定約畫押之權與定約後批准之語是貴大臣僅有

將所商何事報明國家之權而已本大臣斷難與議如謂貴國約章如此本大臣不以爲然
既與本國商議要事卽應照萬國公法不能照中國約章若既定約不惟畫押且應遵守此
事本國並未向中國先說設所議未必能成及議定畫押後視同廢紙本國皆不肯爲蓋議
定之約彼此均應照辦中國不論何時果有誠心講和所派大臣確有切實全權字據其聲
名位望足將所議各款能邀批准本國仍可與議乞呈覽桓友馬

(二六) 北洋大臣轉張蔭桓等來電

光緒二十一年正月二十二日到
電報檔

密新張侍郎馬未滬電初六次廣島倭派伊藤陸奧會議敕書交閱未遞互換敕書越日伊
陸以敕權尙須隨時電署請旨不能開議伊藤口誦英文說帖陸奧手遞東文略節聲述使
權不足之故如中國再派大臣給足使權日本仍願與議云與商補請電旨不允且謂卽補
頒敕書亦來不及以此不開議仍係讎敵無可停頓遂備船送至長崎但允將現在情形明
電田貝達署十一抵長崎田述署電屬留侯信署已知此間不能發密電留候何益倭援公
法促行更無留理適稅司吳得祿自美赴港因託密電赫德十七有旨令回廣島散議後伊
藤留伍廷芳問起居甚切越日廷芳往見又留談甚久伊藤總願恭邸與中堂與議庶能肩

任不致翻覆有願赴旅順就議之說亦令吳電赫達署大約倭意此議期速定似慮條款散布爲英俄所持主議者必當機能斷庶免枘鑿內意如何仍希電復若如田電但補敕書不添派仍無濟云鴻養辰

(二六一一)李鴻章來電一

光緒二十一年正月二十二日到
電報檔

張侍郎電伊藤自負爲日本第一等人故願中國所派爵位相埒始能開議情願親到旅順相就願速了科士達牽率來滬允住八日如留俟約定乃去科謂三月必妥結不必久留科此來悉辭美都各席風雪嚴寒如期至倭相候酬以二萬五千美銀在倭爲草各稿並與倭外務狀師端迪臣辨論數次端亦美族科能詳叩之已爲倭起定約稿索款案地科不能決至索改舊約案開口岸及未戰以前齟齬之事須援公法與辦者非科不可科爲美重此費萬不省承飭轉致應否訂至三月乞電復旌旆進京商辦萬不可少國書可免勅書照乙酉在津與伊藤互換之式便妥但須託田貝與商能發密電爲要云鴻先將奉命大略電知並屬轉致科士達應請留至三月此等重大事非有狀師襄理不可既稱國書可免請署查乙酉在津與伊藤互換勅書之式酌照辦理伊藤願到旅順相就未知確否請屬田貝電詢若

能在烟台會議尤妥伊藤每欲鴻章往日本報聘爭此體面倘將來和議成後自揣精力能遠涉風濤亦可赴倭一行可於田貝閒談詩諭知免又遠行徒損國體現議於廿五日交卸廿七日趕程請代奏

(二六一二)李鴻章來電二

光緒二十一年正月二十二日到
電報檔

滬局電各西人聞中堂奉命咸額手爲然頃知俄主面語王欽使自願與英主出爲排解云鴻養已

(二六一三)李鴻章來電三

光緒二十一年正月二十二日到
電報檔

劉含芳箇電頃德兵艦稱聞前日威島小船掛白旗出口往倭督船因告倭爲丁提督并劉張兩鎮已死請緩三日勿戰料理丁提督等喪事故倭船至今未進口島臺白旗亦係喪旗非降旗也艦未全沈尙有三大三小等語鴻查艦雖未沈而陷在賊中無由保護勢必擄養

(二六一四)李鴻章來電四

光緒二十一年正月二十二日到
電報檔

馬電奉旨許景澄購到槍枝恐難適用等因查許景澄購來毛瑟單嚮槍一萬零八枝業經全數分撥各軍應用前於正月齊電報明督辦處在案鴻曾驗明該槍內間有舊者似德國官兵用過之槍聞係倉猝收集然機簧無損零件齊全並無不適於用之處謹據實復陳乞代奏

(二六一五)李鴻章來電五

光緒二十一年正月二十二日
電報檔

周臬司箇電章高元十九過石山站兩日雪已晴道滑約廿五六抵津聶士成十八拔隊須二月初七催到津已囑各局預備多車以利遄行並函催聶現宋依吳三帥約會攻海城日內必有捷音云

(二六一六)山東巡撫來電

光緒二十一年正月二十二日到
電報檔

號電奉旨丁槐隊伍即日可到飭令相機援剿李占椿等分別嚴催飛速前進等因同日又奉旨高燮曾奏利津牡蠣嘴一帶漁戶甚多舉辦漁團可資助剿又該處素多鹽梟可募令爲勇等因欽此查丁槐軍分兩路一由濟南一由諸城均已進發計月內可到黃縣頃接松

椿電李占椿萬本華兩軍於十二日過桃源縣境張國林一軍定期二十二日由清江啓行已分別恭錄諭旨發催飛速前進利津牡蠣嘴係武定屬該府南自利津北至海豐海口甚多前已派候補道丁達意帶五營前往分駐奉旨舉辦漁團遵飭丁達意酌量辦理至另募鹽梟一節丁槐到東卽與衡電商已派員設法招募乞代奏

(二六二七)幫辦北洋大臣來電

光緒二十一年正月二十二日到
電報檔

本日接蘇元春電稱倭氛甚緊元春意率勁旅二萬以效前驅懇代奏等語查蘇元春係前在浙撫任內舊部諒山之役頗著功績茲情殷報效未敢壅於上聞惟人數過多長途不芻或令減半或勿庸議理合代奏請旨

(二六一八)出使龔大臣來電

光緒二十一年正月二十二日到
電報檔

法外部告慶常云和局已與英俄商極力調處俟倭說出索項卽爲參酌並囑施使出力滇界已定仍願商務早定更感睦誼竣夕回英瑗號

(二六一九)署南洋大臣來電

光緒二十一年正月二十二日到
電報檔

洋將郎威理前在北洋兵船教練精勤號令嚴肅各輪技藝皆有可觀因各輪船將領多係閩人結黨排擠辭差回國此事中外人人皆知今欲急練海軍以爲遠圖非得力水師大將不可惟該洋將相宜此人現在英國爲水師副提督必須許以高官重任方肯舍之而來擬請由總署令赫德速致該員一電召其回華告以常用爲南洋水師提督蓋外洋視水師提督或可鼓舞效命中國除北洋外閩粵皆有水師提督權位皆不比外洋之重似無所妨請旨遵行請代奏之洞肅

(二六二〇)軍機處電寄宋慶等諭旨

光緒二十一年正月二十二日
電寄檔

奉旨宋慶等電奏派兵會攻海城等語倭寇堅踞海城依克唐阿等屢攻未克宋慶吳大澂現各派兵前往策應務飭各將領合力同心迅圖攻拔先行肅清北路長順等電奏請各軍分路進規岫巖蓋平鳳凰等城應俟海城克復後再籌進止欽此正月二十二日

(二六二一)軍機處電寄李鴻章諭旨

光緒二十一年正月二十二日
電寄檔